

中國方志叢書·華中地方·第三八九號

據

民國·柳琅聲等修，韋麟書等纂
民國十五年鉛印本

影印

四川省

南川縣志

(四)

成文出版社有限公司印行

南川縣重修縣志卷十二

藝文

邑中文苑遺著寥寥其游覽山川景物敘述建置原委者既附之各篇各節本事後矣其他泛悠之作志例不宜濫登然有不必過拘者文章之美非刻不傳然或以篇少而不足刻或以資紕而不能刻珠復沈於淵焉僻邑窮鄉文采雖不充盛豈無一二儔才劬學折肱斯道偶有心得堪登大雅之堂者緣此二難遂至白首青燈脫稿之後幾度吟哦旋瘞竹簾殊可惜也邑自清道咸以前先輩咳唾無一存者近世孝廉徐公筱蕃才氣橫傑矯矯不羣選拔劉君德宣專門掣經確有家法邑人咸推重之惜皆不自收拾中年歎逝其精心結撰者亦多喪佚今各搜得數篇亟爲流播又楊先生彩峯許先生士伯砥礪儒行守約安遇孝典辨善瑣言二作留心社會有轉移風俗之思序雖淺近而志不失貞閱者幸置其詞而嘉其意焉壽文墓誌溢美恆多見存人作品題未定遵例不錄惟有事實關係附各篇資證明者不在此限詩附

專著存目

南平軍圖經一卷見宋藝文志不著作者久佚

南平志通志載郡守趙興逸序志序並佚

國法須知一卷清嘉慶時舉人周伯寅就大清律例摘要刻本

家禮須知一卷前人就朱子家禮摘要

六事箴言六卷前人撰已刻

家常瑣語一卷同前

勸規錄六卷歲貢生徐作式撰

海天閣詩鈔六卷古文二卷舉人周石蘭著

思無邪齋詩賦文稿拔貢周立椿著未見卷影無攷

松風閣詩集十卷舉人周立矩著

愛晚山房詩集舉人康作霖著

宜春山房古文副榜楊榮封著

遠山時藝貽經堂文集荆坊書屋試帖進士章杰生著

讀史一斑六卷舉人袁誦如著

和齋詩稿茂才章同著

彝歡堂詩文集歲貢唐銳著梓行

平武縣學約一卷舉人徐大昌在訓導日著已刻

筱帆詩集前人著已刻

周易分類解腋二卷茂才許廷陸著未梓

辨善瑣言二卷前人著已刻

韻學約編布衣駱式三著已刻

孝典四卷茂才楊福瓊編見存待梓

浪吟狂徒稿四卷茂才曹因培著未梓

馥堂詩稿附貢賴松雲著未梓

樂翁詩稿三卷歲貢康敷政著未梓

韋氏宗譜二十四卷監生韋葆初舉人韋燦同編輯已刻

唐氏族譜四卷布衣唐啓蔚編輯未梓

假鳴集詩稿一卷監生韋登曜著未梓

讀史膚見一卷舉人韋燦著未梓

八柱集八卷監生周紹堯編輯已刻

遊子吟正續集民國川陝邊防軍混成旅長謝家駒著已刻

選文存目

劉孝標墓銘

州志晏殊撰舊志同文佚

右係舊魏黃兩志原題按南梁劉孝標北宋晏殊史籍著名二人相去約五百年且與荒遠之南平隆化無涉此題決非其人銘既不傳時代事跡一無可徵真郭公夏五之闕文也以前志累載必非無因姑存之待能考者

選文

明永歷帝誥封石琳三代及琳夫妻制詞十一道

奉天承運皇帝制曰臻化致治之原莫先於教育德興行多士賴之而造家之法亦畢於是杖履自有淵源箕裘聿深積累爾原任湖廣湘鄉教諭石繼崑乃總兵官掛翹蜀將軍印左軍都督府左都督石琳之曾祖父秀鍾蠡國風被湘鄉鑿險當壯士既開文章隨峽水俱下問奇得先生之席景仰並峨岫同高善氣四時炤無疲鏡春風一月扣不窮鐘齊右之歌共傳三魯之業弗墜藏山竹管移付戎編投懷金鈎換懸肘印故傳刀較勝捧硯故業崢嶸而在泮且以獻酋英姿颯爽昌繇啓後禮重隆先嗚呼何其善積歟茲以覃恩贈爾光祿大夫如爾曾孫官爾聞譽殆終古不歎

制曰人事規百年之遺典禮大四世之報爰及胥宇式重徽音固儼優如在也爾鄧氏乃總兵官掛翹蜀將軍印左軍都督府左都督石琳之曾祖母克正內位思衍後昆絳帳而授生徒幾並西河之席青幢而贊樸棧定留東川之車遡原初生考成女式故姜嫄至太姒之德母教亦有箕裘斯嘉貞迨弘靖之名臣經共傳繼述堂槐老去坐懷遺澤泰娛拱木依然尙憶立家緒秀茲以覃恩賜卹爲一品夫人丘墟草際長發其幽光日暮碑陰式承乎顯賁

奉天承運皇帝制曰垂雲有翼可識培風負水維舟將觀濬派瞻爾德星之社必騰金宿之輝爾石子琦乃總兵官掛翹蜀將軍印左軍都督府左都督石琳之祖父天半朱霞雲中白羽高隱四十之數必待歆訃醉翁山水之間寧殊許務竹通一節昌及苗裔雀奉雙環貴貽孫子名乃試于小草仍不虧太璞之完勳遂建乎長戈正不使泥珠弗耀是故積金積書積善積愈高而益光立德立言立功立始全而相映天之布算甚長人之食德惟後恩流拱木義愜重泉茲以覃恩贈爾光祿大夫如卿孫官錫之誥命爾昔優才下位遭世之平應有孫顯於今世試觀可置萬家之處將煥五彩之章

制曰尊祖及妣王制以報貞臣釐女從孫天命爰開令緒追崇有典烝畀宜均爾陸氏乃總兵

官掛翹蜀將軍印左軍都督府左都督石琳之祖母內則可師大家作教潔供免菟晨昏致謹於承筐儉有荆釵寒暑允恭於捧檣彼條桑織素之無愆流風競羨識荈藻牲魚之有自闔範推賢鍼管線續當年致節閨中帶礪河山奕世賁榮閭外蓋權奇龍友歌美渥洼而神彩鳳毛歸功丹穴茲以覃恩封爾爲一品夫人錫之誥命絲綸有赫襲雨露於松楸翟弟長新護風雲於川岳

奉天承運皇帝制曰弓冶有緒知川嶽之降神作述無憂惟熊羆而叶瑞故南山之木應能席陰金氣之星謂爲燭漢爾原任通政司通政石應祥乃總兵官掛翹蜀將軍印左軍都督府左都督石琳之父世衍文緒教切義方讀天祿之書文書發戎書之秘守聖賢之道父道該臣道之先雖宦隱疑山曾已身依日月而心清同水何妨韻帶山林登仕進之途如闔前當留餘地啓繼體之業比弓矢還在荆人報國開勳趨庭著訓是用覃恩贈爾爲光祿大夫如爾子官以究爾之業知爾魂怡而色慶

制曰王陵著節將寄語以堅心陶侃功高亦長號於捫足理惟水源木本事比師教父成爾魏氏乃總兵官掛翹蜀將軍印左軍都督府左都督石琳之母譽藉家乘才襄闡政辟纊夜永戒

子逸勞饘粥晨親恤人甘苦兵法推稱胎教家榮並擅國華茲以覃恩錫爾爲一品夫人煥鳳池之恩綸從虎子以錫爵

制曰禮拘人後報重本生故使罔極並伸始立情文之極爾石美玉乃總兵官掛翹蜀將軍印左軍都督府左都督石琳之生父學窺道奧譽藉儒宗事業藏諸名山超然遠世勲庸翊乎白水留與後人光及幽骸黃焚盛事雖移階植玉而掩土來思茲以覃恩贈爾爲光祿大夫如爾子官命以義夫爾究食有子之貴

制曰共安挽鹿夫曰婦從獨識和熊子以母貴爾某氏乃總兵官掛翹蜀將軍印左軍都督府左都督石琳之生母相駿士之幽貞產虎臣而卓犖投懷有夢兆預當年寄乳分祥光貽兩閣周歲爭看弄印并席樂受舞衣用循覃典贈爾爲一品夫人感烏哺之情發彤管之色

奉天承運皇帝制曰威行絕幕衛霍之所經營績奏收京韓劉於焉寤寐誰張細柳我詠大風任韓厥以下軍拔狄青於行列當不禁分闡寄念與之共功名也爾總兵官掛翹蜀將軍印左軍都督府左都督石琳筆彩生花劍光搖斗當年酣文戰曾爲筆掃千軍因時銳請纓誰許劍藏國士故志有專注爲予警猿鶴沙蟲豈才乏兼通使人笑陸隨絳灌蠶叢魚鳧之地誼切纓

冠貴竹轡荆之間功尤領袖百里看日中之闢諸軍從壁上而觀馬汗無停蟣衣長著師非殘
花之雨身苦戰陣之雲故韃韃雖未臨行而鼙鼓恆如在耳用循覃典授爾勳一階爲光祿大
夫總兵官掛翹蜀將軍印左軍都督府左都督錫之誥命惟汝益勤新烈追配古人足與虓虎
爭雄豈靳圖麟上賞欽哉

制曰富可易衣獨恐傷糟糠之意貴而忘我寧忍犯戾戾之歌撫舊劍遺簪度春風秋雨慨可
知矣爾焦氏乃總兵官掛翹蜀將軍印左軍都督府左軍都督石琳之妻冠帶遺男遵廬任運
吳江楓落第謂驚豐無如雨集絮飛亦惟雅思堪匹安知班生之功名乃在塞外而使方士之
夢草已入懷中直至黃墟復承朱紱是用覃恩贈爾爲一品夫人錫之誥命汝之徽音儼然彝
章煥若又何必不亡爲愈乎

制曰昔高皇帝念將士之家情逾骨肉文皇帝惜從征之婦手賜金銀雖古有遣戍之詩亦備
極纏綿况余資復宇之績乃缺略褒旌爾李氏乃總兵官掛翹蜀將軍印左軍都督府左都督
石琳之繼妻奇男子風不屑以酒食而襄宴樂擔國家事恆捐此簪珥以勵精忠河北二十四
城任夫人尙留芳躅項城三千餘卒虎賁士敢擅一心爾之佐夫事幾符古用循覃典封爾爲

一品夫人錫之誥命卓然閨傑分我川嶽之靈粲然彝章表汝河山之度

孝子周公墓表

山東歷城人 周永年

孝子周公世居四川南川縣原籍江西吉水人明萬曆中以宦籍居貴州婺川縣有諱培衡者公之曾祖也配商氏子芝芳因明季兵亂奉母徙南川爲人磊落以義氣自負娶令狐氏姑商年高齒盡脫每晨起則盥沐拜姑而乳之事聞於大府爲表其閭子師文勅贈文林郎娶陳氏明總鎮維縑公之女也勅封孺人文林公性恬澹好讀書不求仕進子三長萬祥季萬資公其仲也諱萬殊字同川幼穎異讀書過目能背誦年十三應童子試邑老宿楊先生以女字之甲辰遭父喪毀瘠幾至滅性葬後廬墓三年從遊者日益衆爲文力追先輩辛酉學使張公仕遇奇其文拔貢大學癸亥歸里適母病危割左肱肉和藥以進而病愈甲子就試北闈場後選授湖南直隸郴州州判乙丑迎母至署色養倍至奉檄辦桂東縣礦務礦徒五方聚集公感之以恩約之以法皆恬然以伏運鉛赴京過江有覆舟公出數十金募人拯救全活多人勘災過洞庭有龍現於水面衆皆震恐公曰余心無愧作不爲害旣而果然丁卯母氏歸蜀癸酉遭兄喪公泣曰吾母其何以堪急遣妻妾及子先歸侍養是年恭逢覃恩得封典甲戌告養回籍丁丑

遭母憂盡心喪葬庚辰赴部候補子士孝舉於鄉辛巳奉發湖南歷署長沙衡州永州岳州諸府通判道州州判廉能懋著乙酉補原缺郴人聞之額手相慶丁亥以疾歸祖餞者相望於道時子士孝知禹城迎養來東時時戒以防吏胥之奸欺恤百姓之疾苦故禹城之治至今百姓稱頌太翁之德於不衰楊孺人幼篤孝曾割臂以愈母疾年二十來歸躬紡績以供甘旨教訓子弟不事姑息視庶子無異所生戚黨間貧苦者每綴衣食周之公生於康熙四十三年卒於乾隆三十四年壽六十有六歲乾隆十七年勅授徵仕郎三十七年勅授文林郎楊孺人生於康熙四十二年卒於乾隆十八年壽五十有一歲子八長士孝楊孺人出次士廉士節士濤士岳側室鄒孺人出土禧士壽士康側室姚孺人出女子子十二人孫男十人石蘭立矩立楷立箴立模立範立璋立瑛立誠立審孫女十三人公與楊孺人前後俱葬於宅後紫柏坡者有年矣戊申之春士孝以墓碑未樹持狀來乞余爲表墓之文因仿姚文公志梁孝子之例以表其墓且係以銘銘曰

昔元牧菴姚文公曾有言維皇畀人以福澤猶人以盜粟與人然審其多寡之堪受銖石衡量無相懸割肱和藥已母疾篤孝一念天所憐視民痼瘼乃在身溝中之瘠無饑寒惟孝與

慈兩無愧猶然號號省厥愆一動一靜嚴顧諟朝夕虔持太上篇恐干神怒神降福子有八
士孫曾繁長幼昂率以孝友山村午夜聞誦絃惟農力田自有秋科名拾取如蟬聯蔚爲南
川之望族不數浦江有義門天語煌煌耀崖阿宰木鬱鬱凌雲煙過客停舟肅衣拜皆羨公
之得天何其厚嗚呼芝固有根兮醴固有源

晉贈奉直大夫章公巨英傳

周維垣

碩華先生諱巨英古隆化人也章氏之先莫盛於唐伯仲崔盧雖天子亦艷其華胄城武安鄉
諸君子其文章事業長與天地無終窮逮明初有以武功宦蜀者遂家於南川而簪紱之榮文
物之盛又爲一邑冠信乎源遠而流孔長也先生博涉書史幼卽喜談經濟不屑爲帖括業不
事家人生產分爨美田宅悉以讓諸昆季家無甌石無所介意嘗泛舟楚湘遊河北出古邊城
見塞外風雲之壯麗河山人物之瑰奇與夫渾脫旃裘冰天雪窖一切可驚可愕之變態益以
開拓其心胸而恣放其眼界彷彿陳季常精悍之色見於眉睫時同邑肅齋周公宰山左勸援
例就職先生曰大吏吾不得爲丞尉吾不甘爲吾其歸以教子孫讀耳其平居左圖右史垂疎
箔據隱囊把一卷觀古今成敗出則屨鞋桐帽隨小奚與親戚鄉里說彝倫講人生節義方規

圓矩無曖昧人亦不敢以曖昧事干之家訓尤嚴整哲嗣如僑公雖補博士擁皋比爲人師猶
悚息侍側唯謹年七十時大府採其行誼上之於朝躬膺優典邑人以爲華焉賢配宜人氏鄭
邑名家女事翁姑孝事夫子敬訓誨子孫中禮中度諸餘須姒姆棟樑盡職內外井井罔不皆
有法度誠足以佐君子偕嘉耦也嘉慶乙亥丙子間垣供職戶部先生之冢孫紫航以拔萃來
京師下榻寓宅者凡四年朝夕道家常得先生生平甚悉自移守黃州苦音塵迢遞本年冬初
適紫航以先生行狀來囑作傳開函朗誦猶京邸煮茗清話時而先生沒五年矣嘗謂天下權
奇倜儻之士其氣魄可以肩重任其精力可以宏遠謨得時卽當樹勳立名以光揚竹冊不然
而乘下澤車御款段馬鄉里稱爲善人卽亦仰無愧俯無怍乃或恃其才幹而爭及於刀錐或
逞其強梁而訟生於鼠雀究之浮雲蒼狗醴泉芝草如現曇花觀於先生之亢華宗而振基緒
其亦可以興起也已按先生一子名惠卿邑庠生孫杰生刑部主政薰生恩貢生曾孫某某贊
曰

動搖山嶽公家御史掃地焚香公家杖履滿簾黃金何如一經教子必如先生之明目張膽
斯可以綿延福祉洵如宋廣平之言盛德遺範盡在此矣

流金渡說

邑副 楊榮封

距邑北十里許瀕河架木版以渡人名曰流金渡隔岸有一石崢嶸突兀石有一罅相傳昔石罅日流金少許可給石上寺僧之需僧少之謀所以益之者鑿而擴之而涓涓從此絕矣或曰金生麗水故沙中往往有金茲之開竅於石多寡之數非人力所可施者一經斧鑿既傷其脈復洩其氣所以立竭語誠近是而或曰水生金固也未聞石流金豈傳聞之訛歟抑附會以神其說歟余謂造化靈秀所鍾固有難以常理測者石之流金而子異之也夫鮮答之石產自走獸腹中推之雄鼠卵上之符文野婆腰間之篆印與夫牛膽之黃馬腎之墨狗之寶駝之黃鹿角之玉犀角之通天其於流金說何如耶至於石燕石蛇石蠶石鼃石芝石桂石麵石米石英山海經之玉髓仙經之玉屑皆擬議所不及者而獨於石之流金異之乎惜僧欲多得故逞其智力以冀遂其所欲究之一無所得且並其日所得者而失之也又何如不求多得者之日有所得乎貪之字酷近貧其僧之謂乎然豈獨僧也歟哉

創修章氏前賢譜言行錄合纂世系序

涪州監生 原籍南川 章葆初

譜系之說豈一端哉有合千萬姓譜之聯千古而利天下者有總一姓譜之聯一家而利後嗣

者所譜不同用意各別攷古據今可略數也古者重氏姓巨臣大族有世本上之太史史氏掌之故周禮小史定世系辨昭穆左邱明傳春秋亦言因生賜姓胙土命氏自茲世族燦然不紊
既滅學公侯子孫失其本系漢興司馬遷父子爲太史令乃約世本脩史記因周譜明世家
復知姓氏所由出漢尙官不重世胄魏尙姓不尊寒族所尙異也迄晉尙門第有司選舉必稽
譜籍考真僞故官有世胄譜有世官賈弼王宏譜學出焉宋齊梁宗之由是東南之顧陸朱張
關西之裴韋柳薛楊杜俱稱右姓唐太宗貞觀間特詔高士廉等撰氏族志徵天下譜牒質諸
史籍考真僞辨昭穆第甲乙分爲九等皇族冠首外戚次之凡二百九十三姓不幸遭許李挾
艷后以焚信書氏族志弗傳然世家大族終難湮沒柳芳直史館所由作氏族論矣夫尙官尙
姓古制也至於尙詐其蔽也士族亂而庶人僭故曰不通歷代之說不可與言譜學也五季以
來取士不問世家婚姻不問閥閱於是譜學散佚史氏之掌弗傳路近淳姓略柳中姓系錄蕭
智漢氏姓譜所由膾炙人口也所謂合千萬姓譜之聯千古而利天下者自茲以外族譜家譜
專譜一家而外氏不與焉徵諸史傳聯一姓之譜歷世昭穆共載者始於隋之韋鼎而聯五服
之譜親盡不及遠詳者蓋自初唐曾興始鼎爲楚太傅裔孫隋文帝時作韋氏族譜七卷興爲

宗聖裔孫唐太宗時作曾氏家譜數卷由是家譜族譜並著於世宋歐陽永叔因作宗譜五世一提九世再提始祖詳所自出至五世而提獨詳其本支所出同支之中寓意別族再提亦然所謂宗譜也蘇老泉更作族譜以作譜者爲斷高祖而下詳所出高祖以上不必詳以其親盡也後之續脩者世世僅存其高祖而遷其高祖之父但藏舊譜無毀蓋小宗之法如此歐蘇二家變通家譜法貴從簡然較韋鼎譜法則隘矣明歸崑山乃廣大宗譜法自始祖以下世系名諱靡不詳載不必分定宗法而宗法寓乎其中今之爲譜者大率從此但可詳則詳不可詳者闕文爾呂叔簡譜法更合大宗小宗爲總譜而以門譜分之合者人所同分之則更善矣又曰每世一脩則以文行之士掌之其法尤不可易非所謂總一姓譜之聯一家而利後嗣者乎後此世家大族雖未必盡講譜學而首重譜牒如故也蓋氏有由分必有從出或受封某國起籍何地遷居幾次播遷某時授某官居某房傳幾世若不溯源沿流則分支何所考若不紀明朝代則世系何所據一失考據不可得而譜也我韋氏世譜在夏爲列侯在商稱霸主自殷末失國以後史傳闕文漢初以楚太傅起家彭城厥後明經大儒父子賢相忠臣烈士與漢終始魏晉南北朝史中世胄世官赫然巨室宋祁作宰輔世系表更因世譜分著九房而韋族大著矣

况唐宋兩朝均列外戚姓著上等僅次皇家惜宋末元興冠冕漸替然本支遷蜀始祖派出河南汝寧籍原麻城孝感尙能以南宋節度起家侯爵中州西蜀光昭遠緒大明一代一則出崇名宦一則處祀鄉賢雖公侯將相頓歇無聞而文采風流未嘗廢墜葆初何敢上擬前賢述累朝之先德成一姓之總譜所慮隋朝譜牒既湮沒於已往唐書世表莫續纂於將來縱本支言行略能紀實而前賢功德尙多散逸譬之木然由幹而枝葉譬之水然由源而流派儒者讀書懷古見古人嘉言懿行往往不惜搜羅爲之考其里居詳其世系上溯遠祖賢明下詳子孫窮達而因以想見其爲人夫亦謂前事者後事之師也觀人者自鏡之道也況我族前賢炳煥史冊經業儒宗淵源有自而乃畏千尋建木探本爲難九曲黃河窮源匪易遂甘同籍父受譏數典而忘其祖焉亦未知當務之爲急也然亦有難焉者葆初雖嗜譜學而秉性愚魯藏書無多苟非搜輯難臻美備心識者久之乃~~受~~筆遊藏書家每歷鄴架曹倉集錄前賢志傳事無巨細備採靡遺是舉也自道光癸卯迄咸豐庚申歷十八寒暑凡五易稿當譜未成時屢攜質族中明達往來數次集思廣益必得許可而後卽安獨念前賢世家得其大略本支宗派在所宜詳爰商闔族達者分探世系言行惟遷蜀始祖僅確時代未詳所宗始祖以後三世無顯於元者

幸自明迄今約二十餘世均無脫略其間老成碩彥鬚眉士女有書之譜牒者有載諸省郡縣志者凡其人行誼無虧有關風教咸倣志例編列十條節取採輯續附前賢譜後聊以儀型族子顏曰韋氏家譜言行錄乃創凡例賦總括提綱挈要冠諸簡首共成四卷世系垂絲圖若干卷藝文若干卷依次分載以是爲韋氏族譜云爾後生學者果能於前賢懿行歷世典型實踐而踵行之不更韋族之厚望也夫

四夷志略序

前人

人生百寒暑耳前孺穉後龍鍾中數十年篤於時拘於墟正如井蛙不可語海夏蟲不可語冰蟻旋蝸爭束縛一世悠悠六合誰是長年而云乘長風破萬里浪御八駿遍車馬跡能以舟車所至人力所通親歷乎天覆地載之區躬造乎日照月臨之所不亦難哉昔張騫使西域從者百餘人十三年而歸存者二人耳槎仙且然况下士乎一西域且然况八荒之廣乎竊憶宗少文好遠游及老疾俱至唯澄懷觀道臥以遊之斯亦遊目騁懷之別致也我國朝幅員之廣亘古未有東漸西被南寰北極梯航重譯踴貢稱臣者難屈指數予曾仿朱錫齡一統地輿圖重繪而增補之寄存家孝廉蘭亭書室然限於尺幅終未能遍觀而盡覽也因命三兒樹聲廣搜